

Erindisbréf stjórnar Skóla- og velferðarþjónustu Árnesþings bs.

Bláskógabyggðar, Flóahrepps, Grímsnes- og Grafningshrepps, Hrunamannahrepps, og Skeiða- og Gnúpverjahrepps.

Umboð og skipan stjórnar

1. gr.

Stjórn Skóla- og velferðarþjónustu Árnesþings bs. er skipuð af sveitarfélögunum sem eru aðilar að byggðasamlagi um Skóla- og velferðarþjónustu Árnesþings. Stjórn fer í umboði viðkomandi sveitarstjórna með yfirstjórn skóla- og velferðarþjónustunnar eins og nánar er kveðið á um í stofnsamningi byggðasamlagsins og erindisbréfi þessu.

2. gr.

Stjórn byggðasamlagsins skal skipuð fimm aðalfulltrúum og fimm til vara þar sem einn fulltrúi kemur frá hverju sveitarfélagi. Kjörtímabil stjórnar er hið sama og kjörtímabil sveitarstjórna. Hver sveitarstjórn skal tilnefna fulltrúa í upphafi kjörtímabils og annan til vara. Kjörgengir til setu í stjórn byggðasamlagsins eru oddvitar, framkvæmdastjórar og staðgenglar þeirra í aðildarsveitarfélögunum. Stjórn skiptir sjálf með sér verkum.

Starfshættir

3. gr.

Í upphafi kjörtímabils skal stjórn koma sér saman um fundarstað og tíma en heimilt er að funda á starfssvæði byggðasamlagsins og á fjarfundi. Fund skal halda eigi sjaldnar en tvisvar á ári og oftast ef þörf krefur eða ef meirihluti stjórnarmanna óskar þess. Deildarstjóri skólaþjónustu, deildarstjóri velferðarþjónustu og sameiginlegir starfsmenn skóla- og velferðarþjónustu hafa málfrelsi og tillögurétt séu þeir kallaðir til fundar stjórnar vegna málefna er þá varðar.

4. gr.

Stjórnarfundur byggðasamlagsins er lögmætur þegar meirihluti stjórnarmanna er mættur til fundar.

Formaður stjórnar sér um boðun funda og stýrir þeim. Fundarboð skulu vera rafræn og berast aðal- og varamönnum að jafnaði tveimur dögum fyrir fund. Dagskrá og afrit þeirra erinda sem verða til afgreiðslu skulu fylgja fundarboði. Komi upp mál sem krefst skjótrar úrlausnar stjórnar getur fyrirvari um fundarboð verið skemmri.

Stjórn getur enga samninga undirritað, samþykkt eða ályktun gert nema fundur sé löglega boðaður og fundarmenn nái sameiginlegri niðurstöðu.

Stjórn veitir prókúruumboð fyrir félagið.

Stjórn byggðasamlagsins getur ekki skuldbundið aðildarsveitarfélögin umfram það sem kveðið er á um í fjárhagsáætlun byggðasamlagsins án þess að fyrir liggi staðfesting frá aðalfundi, aukafundi eða öllum sveitarstjórnunum aðildarsveitarfélaganna, eftir atvikum og eðli máls.

Stjórn byggðasamlagsins er heimilt að gera samning við aðra aðila en aðildarsveitarfélögin um framkvæmd einstakra þátta þjónustunnar, m.a. við einkaaðila enda samræmist þeir samningar lögum um þjónustuna, sveitarstjórnarlögum og rúmist innan fjárhagsáætlunar byggðasamlagsins.

Stjórn hefur umboð til að ákvarða um almenna starfsemi byggðasamlagsins og aðlögun hennar að breyttum aðstæðum, t.d. við lagabreytingar, enda rúmist þær innan ramma fjárhagsáætlunar hverju sinni.

Að öðru leyti gilda ákvæði sveitarstjórnarlaga um störf stjórnar byggðasamlagsins eftir því sem við getur átt.

5. gr.

Rita skal fundargerðir stjórnarinnar. Allar tillögur sem fram eru bornar skulu skráðar sem og samþykktar og ályktanir stjórnarinnar. Ritari skal sjá til þess að afrit af fundargerðum séu sendar aðildarsveitarfélögum til kynningar innan 7 daga frá fundi.

6. gr.

Stjórnarmenn eru bundnir þagnarskyldu vegna mála sem þeir fá vitneskju um í starfi sínu fyrir stjórnina og ætla má að eigi leynt að fara samkvæmt eðli máls og/eða lögum, hvort sem þau varða einka- eða almannahagsmuni. Þagnarskylda helst þó látið sé af störfum.

7. gr.

Stjórnin skal leitast við að ná því grundvallarmarkmiði að tryggja að ákvarðanir hennar og vinna skuli fyrst og fremst vera í þágu allra íbúa og starfsmanna sameiginlegs skóla- og velferðarþjónustusvæðis sem leggur þær skyldur á herðar fulltrúum í stjórninni að setja ávallt almannahagsmuni ofar sérhagsmunum hvort heldur er í sínum eigin eða einstakra hópa.

8. gr.

Stjórnarfulltrúi skal víkja af fundi og kalla til varamann sinn tengist hann einstaklingum eða málefnum, sem fjallað er um í stjórninni, þannig að spilt geti óhlutdrægni hans og valdið tortryggni. Að öðru leyti er vísað til sveitarstjórnarlaga varðandi hæfi kjörinna fulltrúa.

Markmið og hlutverk stjórnar

9. gr.

Stjórnin skal vinna að því markmiði að efla samstarf milli sveitarfélaganna á svæðinu og nýta tækifæri til að samþætta sérfræðiþjónustu fyrir skóla- og velferðarþjónustuna með það að markmiði að minnka faglega einangrun starfsmanna og að starfið sé í anda laga um samþætta þjónustu í þágu farsældar barna. Með þessu verði skapað teymi starfsmanna sem samstíga vinnur að því þverfaglega að efla og bæta þjónustu við nemendur, starfsfólk skóla og aðra íbúa á svæðinu.

Hlutverk stjórnar er eftirfarandi:

- gegnir hlutverki yfirstjórnar skóla- og velferðarþjónustunnar og ber ábyrgð á rekstri hennar.
- ræður og veitir lausn frá störfum deildarstjóra skólaþjónustu og deildarstjóra velferðarþjónustu, og gengur frá starfslýsingu þeirra.

- skipar aðal- og varamenn í sameiginlega fagnefnd skóla- og velferðarþjónustu að loknum sveitarstjórnarkosningum á grundvelli tilnefninga aðildarsveitarfélaga og skipar síðan formann og varaformann nefndarinnar.
- tekur ákvörðun um þóknun vegna fundarsetu í fagnefnd skóla- og velferðarþjónustu.
- gerir fjárhagsáætlun fyrir byggðasamlagið að fenginni tillögu deildarstjóra skólaþjónustu og deildarstjóra velferðarþjónustu og leggur fyrir aðalfund til samþykktar.
- fylgist með að rekstur byggðasamlagsins sé í samræmi við fjárhagsáætlun.
- undirbýr aðal- og aukafundi byggðasamlagsins í samræmi við stofnsamning byggðasamlagsins.
- staðfestir ársreikning byggðasamlagsins fyrir ár hvert.
- Sendir fullgerðan ársreikning, staðfestan af stjórn og áritaðan af endurskoðanda, til allra aðildarsveitarfélaga fyrir 1. apríl ár hver.
- getur, sé eftir því óskað, kveðið upp úr um ágreiningsmál sem kunna að koma upp í aðildarsveitarfélögunum eða í fagnefnd skóla- og velferðarþjónustu og varða framkvæmd stofnsamnings um Skóla- og velferðarþjónustu Árnesþings bs.

Samþykkt á aukafundi Skóla- og velferðarþjónustu Árnesþings bs. þann 1. mars 2023.

Því til staðfestingar undirritar stjórn byggðasamlagsins erindisbréf þetta.

Árnessýsla 1. mars 2023